

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN WONG CHEN
(KELANA JAYA)**

PERTANYAAN : LISAN

TARIKH : 25.05.2016

Y.B. TUAN WONG CHEN [KELANA JAYA] minta **MENTERI KEWANGAN** menyatakan :-

- a. sepuluh pembekal terbesar Malaysian Airlines Bhd. ; dan
- b. adakah pihak Kerajaan bersetuju untuk mengurangkan jumlah pembekal kepada 2,000 seperti yang dicadangkan oleh Christoph Mueller.

JAWAPAN

Tuan Yang di-Pertua,

Untuk makluman Ahli Yang Berhormat, pembekal-pembekal utama syarikat Malaysia Airlines Berhad (MAB) terdiri daripada

syarikat pengeluar pesawat dan enjin pesawat, pembekal bahan api, penyelenggaraan pesawat dan catering. Antara sepuluh pembekal terbesar MAB adalah Petronas Dagangan Berhad, IATA Clearing House, Malaysia Airports (Sepang) Sdn Bhd, Willis (Malaysia) Sdn. Bhd, Petron Malaysia Refining and Marketing Sdn Bhd, Kuwait Petroleum International Avia, Shell Malaysia Trading Sdn Bhd, Rolls-Royce Total Care Services Ltd, United Technologies International dan Barhim's Airline Catering Sdn Bhd.

Di bawah Pelan Pemulihan MAS (PPM) yang sedang dilaksanakan mulai 29 Ogos 2014, MAB turut memberi tumpuan kepada kajian semula kontrak bekalan syarikat. Bagi tujuan tersebut, lebih 4,000 kontrak telah dikenal pasti untuk semakan semula secara komprehensif. Rundingan semula kontrak-kontrak tersebut bertujuan memperbaiki terma perjanjian sedia ada supaya terma baharu selaras dengan penanda aras pasaran. Pada masa ini, MAB masih lagi giat mengkaji dan mengadakan rundingan semula perjanjian dengan pembekal-pembekal sedia ada bagi mencapai sasaran 2,000 kontrak sepertimana yang dicadangkan. Kajian dan rundingan semula kontrak ini adalah penting bagi membantu MAB memulihkan syarikat dan seterusnya mencapai keuntungan yang mampan.